

PËRMBLEDHJE: ËNDRRA E PERËNDISË PËR JETËN TËNDE!

6 Fazat e Besimit (2)

Jeremia 29:11 "*Sepse unë i njoh mendimet që kam për ju, thotë Zoti, mendime paqeje dhe jo të së keqes, për t'ju dhënë një të ardhme dhe një shpresë.*"

Si Ta Zbulosh Ëndërrën Që Ka Perëndia Për Ty?

1. Ia Përkushtoj Jeten Time Perëndisë

"...Ta paraqisni trupin tuaj si fli të gjallë, të shenjtëruar, të pëlqyer te Perëndia, që është shërbesa juaj e mençur. Dhe mos u konformoni në këtë botë, por transformohuni me anë të përtëritjes së mendjes suaj, që të provoni cili është i miri, i pëlqyeri dhe i përsosuri vullnet i Perëndisë."

Romakëve 12:1-2

*"...Duke hedhur tej çdo barrë dhe mëkatin që na qarkon vazhdimisht duke na joshur, le të rendim me durim në udhën (në garën) që është përpara nesh." **Hebrenjve 12:1***

2. Ndaj Kohë Më Vete Për Perëndinë

*"Dëgjo këtë, o Job, ndalu dhe merr parasysh mrekullitë e Perëndisë." **Jobi 37:14***

Shembuj

- | | |
|-------------------------------|-------------------------------|
| - Abrahami - Zanfilla 15:5 | - Elia - I Mbretërve 19:11-12 |
| - Jakobi - Zanafilla 32:24-29 | - Nehemia - Nehemia 1:4 |
| - Moisiu - Eksodi 3:1-10 | - Habakuku - Habakuku 2:1-2 |
| - Gideoni - Gjyqtarët 6:11-14 | - Pali - Galatasit 1:17-18 |
| - Davidi - Psalmi 5:3 | - Jezusi - Luka 5:16 |

3. Dalloj Aftësitë e Mia

*"Ju në fakt jeni vepra e Tij (Perëndisë), e krijuar në Krishtin Jezus për vepra të mira që Perëndia përgatiti që më parë, që ne të ecim në to." **Efesianët 2:10***

*"Gjithsecili le ta vërë në shërbim të tjetrit dhuntinë që ka marrë, si kujdestarë të mirë të hirit të shumëllojshëm të Perëndisë." **1 Pjetrit 4:10***

*"Dhe tani, duke pasur dhunti të ndryshme sipas hirit që na u dha..." **Romakët 12:6***

4. Shoqërohemi Me Njerëz Që Kanë Ëndërra

*"Hekuri mpreh hekurin, kështu njeriu mpreh fytyrën e shokut të tij." **Fjalët e Urta 27:17***

*"Mos u gënjeni, shoqëritë e këqija prishin zakonet e mira." **1 Korintasve 15:33***

5. E Tregoj Ëndërrën Time Publikisht

*"Besimi është siguria e gjërave që shpresohen, tregim i gjërave që nuk shihen." **Hebrenjve 11:1***

*"Davidi mbasi zbatoi këshillën (qëllimin) e Perëndisë në brezin e tij, vdiq..." **Veprat 13:36***

"Unë nuk dua t'ia di fare për jetën time që nuk e çmoj aq, sa të kryej me gëzim vrapimin tim dhe shërbesën që mora nga Zoti Jezus..." Veprat 20:24

MESAZHI I PLOTË
ËNDRRA E PERËNDISË PËR JETËN TËNDE!
6 Hapat e Besimit (2)
Jeremia 29:11

Ne kemi filluar Serinë, “6 Hapat e Besimit”, Kjo është pjesa e dytë. Herën e parë i bëmë një përmbledhje të gjithë serisë. Sot po fillojmë me hapin e parë. Hapi i parë është, ti duhet të gjesh se cila është ëndrra e Perëndisë për jetën tënde.

Por, si mund ta marrësh një ëndërr? Ku mund ta gjesh këtë lloj ëndrre, ëndrën që Perëndia ka për jetën tënde? Ëndrra është shumë e rëndësishme në jetë. Unë kam arritur në përfundimin që nuk ka njerëz të mëdhenj. Por ka vetëm njerëz të thjeshtë, që janë të përkushtuar ndaj ëndrrave të mëdha. Kur ti jepesh pas një ëndrre të madhe kjo gjë të përfshin, dhe ti arrin aty ku s’do të arrije kurrë më parë. Perëndia përdor ëndrrat tona për tre qëllime: **1.Për të na dhënë drejtim, 2.Për të na formuar si person**” dhe **3.Për të na treguar aryen përse na krijoi.**

Ëndrra jote përcakton dinjitetin tënd—mënyrën sesi ndihesh për veten tënde. Nëse ti nuk ke një ëndërr për jetën tani, ndjenja që mund të kesh, është: “*unë thjesht po ekzistoj*”. Dhe pyet veten: “*Përse jam këtu? Për çfarë jam krijuar? Përse të ngrihem në mëngjes nga krevati? Përse të shkoj në shkollë në punë? Cili është qëllimi i jetës time? Çfarë më motivon të bëj këtë që bëj?*” Kur s’ke ëndërr për veten tënde, nuk ke as vlerësim për veten. Kur ti e di cila është ëndrra e Perëndisë për jetën tënde dhe fillon ta plotësosh planin për të cilin Ai të krijoi, atëherë do të ndihesh më mirë për veten tënde. Pasi të njohësh Krishtin si Zotin tënd, gjëja e dytë më e rëndësishme është të kuptosh cila është ëndrra e Perëndisë për jetën tënde. Sepse ajo, është arsyeja përse ekziston, qëllimi pse jeton. Nëse nuk e gjen këtë ëndërr, je vetëm duke shtyrë ditët, duke “*vrarë*” kohën. Jeta merr kuptim tamam vetëm kur ti e zbulon, **Përse të krijoi Perëndia ty? dhe Çfarë do Ai, që të bësh me jetën që ta ka dhënë?**

Jeremia 29:11 *"Sepse unë i njoh mendimet që kam për ju, thotë Zoti, mendime paqeje dhe jo të së keqes, për t'ju dhënë një të ardhme dhe një shpresë."*

Ëndërra e Perëndisë për jetën tënde, së pari është personale—jo vetëm për të ndihmuar dikë, por është së pari për ty, për jetën tënde, një plan personal. Është plan pozitiv—të jep shpresë, i jep kuptim të ardhmes ditëve që do të vijnë.

Si Ta Zbulosh Ëndrrën Që Ka Perëndia Për Ty?

1. Ia Përkushtoj Jeten Time Perëndisë

Së pari, duket të jesh i gatshëm për ta bërë një gjë të tillë, Zot çfarëdo që të duash prej meje do ta bëj, dhe ky lloj qëndrimi duhet të jetë përpara se ta tregojë Perëndia ëndrrën.

Romakëve 12:1-2 *"...Ta paraqisni trupin tuaj si fli të gjallë, të shenjtëruar, të pëlqyer te Perëndia, që është shërbesa juaj e mençur. Dhe mos u konformoni në këtë botë, por transformohuni me anë të përtëritjes së mendjes suaj, që të provoni cili është i miri, i pëlqyeri dhe i përsosuri vullnet i Perëndisë."* Nëse ti ia përkushton veten, ia paraqet, e ofron veten tënde si një fli e gjallë, atëherë ke për ta mësuar vullnetin e Perëndisë për jetën tënde. Nëse i përkushtohesh seriozisht Perëndisë nuk ka mundësi të humbësh atë që do Perëndia nga ty.

Si është vullneti i Perëndisë? Është i mirë është i pëlqyer dhe është i përsosur. **Perfekt**, kjo fjalë në gjuhën origjinale ka kuptimin: *"më përshtatet mua, më shkon mua, tamam siç dua unë të jem, ashtu siç mund të jem, siç duhet të jem"*.

Por si mund ta zbuloj këtë vullnet? Shkrimi thotë: *"Paraqite, ofroje."* Përkushtoje çdo pjesë të jetës sate. *"Unë i përkushtoj kohën, aftësitë, miqësitë, pasuritë, të shkuarën time, të sotmen, të ardhmen."* Nëse nuk e bën këtë përkushtim total para Perëndisë, nuk ke për ta zbuluar kurrë ëndrrën e Perëndisë për jetën tënde.

Vargu thotë *"mos u konformoni në këtë botë, pra mos iu përshtasni stardardeve të kësaj bote."* Përse futet kjo pjesë në këtë varg që flet për vullnetin e Perëndisë, për ëndrrën e Perëndisë? Shumica e njerëzve e humbasin ëndrrën e Perëndisë sepse ata nuk i kanë sytë tek Perëndia, por diku tjetër. Ata janë duke parë se çfarë po bëjnë të tjerët. Ata janë duke imituar njerëzit e tjerë, jo Perëndinë. Nëse ti mundohesh të imitosh dikë tjetër, ke për t'u bërë kopje e dikujt tjetër, në vend të bëhesh personi që të krijoi Perëndia në fillim. Arsyeja numër "1" përse njerëzit e humbasin ëndrrën e Perëndisë për jetën e tyre është se; ata po mundohen ti përshtaten kësaj bote, të jenë të kohës, të jetojnë sipas stileve të fundit, dhe nuk po kërkojnë ëndrrën, vullnetin e Perëndisë për jetën e tyre.

Nëse do seriozisht ta gjesh ëndrrën e Perëndisë për jetën tënde, atëherë duhet të vendosësh: *"A do të shkoj të jetoj sipas kësaj bote, të jetoj në stilin e tyre, apo do jetoj sipas vullnetit të Perëndisë?"* Përkushtoja veten Perëndisë dhe mos u shqetëso të bëhesh si gjithë të tjerët.

Hebrenjve 12:1 *"Duke hedhur tej çdo barrë dhe mëkatin që na qarkon vazhdimisht duke na joshur, le të rendim me durim në udhën (në garën) që është përpara nesh."*

Perëndia ka caktuar një garë vrapimi për secilin prej nesh. Nëse je duke parë të tjerët, ke për të përfunduar duke vrapuar në garën e tyre. Perëndia ka caktuar një garë në të cilin, ti duhet të vraposh për veten dhe asnjëri tjetër nuk mund ta bëjë, ta vrapojë.

Ai po të thotë të fokusohesh tek *“kjo gjë”* dhe të heqësh dorë nga *“bagazhet e tepërta”*. Mund të jetë një shoqëri, miqësi që po të largon ty, sepse ata kanë synime që janë në kundërshtim me atë që Perëndia ka për jetën tënde. Shiko, nuk mund të kënaqësh njerëzit dhe Perëndinë në të njëjtën kohë.

Përkushtoja jetën Perëndisë. Ka shumë gjëra në jetën tënde që nuk janë të këqija por nuk janë të nevojshme. Hidhi bagazhet e tepërta. Unë mund të merrem me shumë gjëra çdo ditë të cilat nuk janë të këqija por që mund të më largojnë nga ajo që është më e mira, nga ajo që do me të vërtetë Perëndia të bëjë me jetën time. Perëndia do të veprojë në këtë botë nëpërmjet teje.

3. Ndaj Kohë Më Vete Për Perëndinë

Duhet të rrih në qetësi, nëse do që të dëgjosh kur flet Perëndia. Nëse do që të dëgjosh se cila është dëshira e Perëndisë për jetën tënde duhet *“të fikësh”* të gjitha ato gjëra që të shpërqëndrojnë, që të heqin vëmendjen nga Perëndia. Nuk mund të dëgjosh Perëndinë dhe zërat e botës në të njëjtën kohë. Arsyeja pse Perëndia nuk u flet kurrë disa njerëzve është sepse ata nuk janë kurrë të qetë. Mendja jote është e zënë gjithë kohën, Perëndia mundohet të lidhet me ty, por linja jote del gjithmonë e zënë. Ti duhet të kalosh kohë më vete me Perëndinë, të bisedosh me Të, të dëgjosh Atë kur të flasë ty.

Jobi 37:14 *“Dëgjo këtë, o Job, ndalu dhe merr parasysh mrekullitë e Perëndisë.”*

Perëndia do që të kalojë kohë me ty. Si ka mundësi që Krijuesi i botës do të kalojë kohë me mua? Nuk e di pse-në por Ai do. Ai thotë: *“eja tek Unë, rri në heshtje, rri i qetë, rri vetëm me Mua dhe të bisedojmë pak bashkë”*.

Paskali tha, “Shumica e problemeve të njeriut vjen se ai nuk është i aftë të rrijë i heshtur.”

A ia vlen të harxhosh një ditë që të kuptosh se cila është ëndërra e Perëndisë për jetën tënde? A ke kaluar ndonjëherë në jetën tënde gjithë ditën vetëm ti dhe Perëndia, duke biseduar, duke u lutur me Të?

Bisedo me Perëndinë në lutje. Lejoje Perëndinë të bisedojë me ty me anë të Biblës.

Qetësohu. Mendo. Shkruaj dikur mendimet që Ai të vë në mendje. Vendos disa synime.

Filloje ditën duke thënë: *“Perëndi, ku do Ti që të shkoj? Çfarë do që të bëj?”*

Ti mendon që nuk ke kohë për gjëra të tilla? Që, ti nuk ke kohë të rrih e të gjesh cili është qëllimi përse Perëndia të vuri në tokë? A mendon që nuk ia vlen?

Perëndia flet me njerëz që e marrin mundimin dhe kohën për ta dëgjuar atë. Dhe kjo nuk duhet të ndodhë një herë, por të jetë takim i rregullt me Perëndinë, siç e quajmë ndryshe, Koha e Qetë, ose K.P.M.P. Seminari 2, nëse nuk e ke bërë Seminarin dy shkruaje tek kartoni i mirseardhjes, sepse aty do të mësosh më shumë sesi të kalosh KPMP.

3. Të Dalloj Aftësitë e Mia

Nëse do ta kuptosh vullnetin e Perëndisë, atëherë shiko se ku je më i/e aftë. Përse Perëndia do të më jepte mua disa aftësi, dhunti, përvoja dhe të mos ma japë mundësinë t'i përdor? Do të ishin të panevojshme. Ai ti jep këto gjëra, Aftësitë, dhuntitë, përvojat, personalitetin, pasionin (dhe të gjitha këto të përbëjnë ty), dhe kur i shikon më me seriozitet të tregojnë qartë drejtimin se ku duhet të drejtohet jeta jote.

Pyete veten: *“Ku jam unë më i aftë? Çfarë është diçka që do e bëja me dëshirë? Çfarë është diçka që e kam pasion? Çfarë më nxit mua dhe çfarë ma heq dëshirën? Çfarë është diçka të cilën të tjerët e kanë parë tek unë dhe më kanë bërë komplimente?*

Si mund t'i përdorë Perëndia këto aftësi për mbretërinë e Tij?”

Efesianët 2:10 *“Ju në fakt jeni vepra e Tij (Perëndisë), e krijuar në Krishtin Jezus për vepra të mira që Perëndia përgatiti që më parë, që ne të ecim në to.”*

Fjala origjinale për *“Vepra të Mira”* është Poema, nga e cila vjen edhe fjala poemë. Ti je poema e Perëndisë. Ti je punë arti e Perëndisë. Nuk ka asnjë si ty. Ti nuk erdhe nga hiçi.

Ka edhe diçka tjetër përveç të qenit unik, i veçantë. Perëndia do që të jesh efektiv. Ai të ka krijuar që të bësh vepra, punë të mia. Madje para se të krijonte, Ai e caktoi se çfarë donte nga ti. Perëndia tha: *“Unë do ta bëj këtë njeri dhe do t'i jap atij aftësi, dhunti dhe talente të caktuara. Do ta lejoj që të kalojë nëpër përvoja të veçanta—disa të mira e disa të vështira”*. Nga disa, Ai e di që do të mësojmë shumë gjëra me herën e parë, nga disa të tjera do të mësojmë pas 5-6 herësh. Ai tha: *“Unë do t'i sjell të gjitha këto gjëra së bashku sepse Unë dua që në botë të arrihet diçka nga ky njeri që po krijohet.”*

Prandaj ti ke kaluar nëpër shumë situata të mira dhe të vështira në jetë.

Nëse nuk po i përdor këto përvoja për qëllimin që i lejo Perëndia, ti nuk po e kap idenë. Një ditë, do të dalësh para Perëndisë dhe Ai do të pyesë: *“Çfarë bëre me ato që të dhashë Unë?”*

Ne u shpëtuam për të shërbyer. Të përdorësh aftësitë dhe dhuntitë e tua për të ndihmuar njerëzit e tjerë.

1 Pjetrit 4:10 *“Gjithsecili le ta vërë në shërbim të tjetrit dhuntinë që ka marrë, si kujdestarë të mirë të hirit të shumëllojshëm të Perëndisë.”*

Ai ti ka dhënë ty këto aftësi që ke, kjo do të thotë që ti nuk i ke fituar vetë. Prandaj, nuk mund të mburresh me to. Nuk është diçka që e mendove ti i pari.

Një nga arsyet përse miliona njerëz e humbin ëndrrën e Perëndisë është se ata gjithmonë janë duke e krahasuar veten e tyre, me njerëzit e tjerë. Por, Perëndia na nxit që ta rrisim ta shtojmë atë aftësi, atë dhunti që kemi. Mënyra sesi rritet është kur e përdor.

Ai thotë: *“nëse ti je besnik me gjëra të vogla, Unë do të jap mundësi më të mëdha”* Bibla thotë: *“Atyre që kanë do t'u jepet edhe më.”* Sa më shumë ta përdorësh atë që tashmë ta ka dhënë Perëndia, ajo aftësi, dhunti forcohet dhe përmirësohet. Nëse nuk e përdor ke për ta humbur.

Romakët 12:6 *"Dhe tani, duke pasur ndryshme sipas hirit që na u dha..."*

Qëllimi i kishës është të ndihmojë ty së pari të njohësh Krishtin, së dyti të rritesh në besimin tënd dhe së treti të zbulosh, vendin tënd në shërbesë, ëndrrën e Perëndisë për jetën tënde. Ose siç quhet ndryshe, shërbesa jote, vendi yt i shërbesës.

Asnjëherë mos mendo që ka kohë për t'u marrë me ëndrrën që ka Perëndia për jetën tënde dhe filimisht merresh me ëndrrën që ke vetë për jetën tënde. Bibla thotë: *"Të rinjtë do të shohin ëndrra dhe të vjetërit do të kenë vizione."* Bibla e mëson shumë qartë që Perëndia ka një ëndërr për jetën tënde.

Nëse do ta zbulosh që tani, mund të përfshihesh dhe të bësh diçka aty ku ti mendon se Perëndia të ka dhënë aftësitë dhe dhuntitë, përvojat dhe pasionin tënd.

A po më ndiqni, a jeni të qartë?! Kemi edhe dy hapa të tjerë.

4. Shoqërohem Me Njerëz Që Kanë Ëndrra

Rri me njerëz që kanë të njëjtën dëshirë si ty, ata duan të zbulojnë ëndrrën e Perëndisë për jetën e tyre. Ëndrrat dhe zhgënjimi përhapen lehtë tek të tjetrit. Njerëzit rreth teje - që për ty janë shokët më të ngushtë - ose do të ndihmojnë të zbulosh ëndrrën e Perëndisë, ose kanë për ta venituar atë ëndërr. Nuk ka shokë neutralë, ose do të ndihmojnë ose do të zhgënjëjnë.

Prandaj, zgjidhi shokët e ngushtë me kujdes. Unë kam parë shumë të krishterë që e kanë humbur ëndrrën e Perëndisë për jetën e tyre, sepse shoku/shoqja e tyre e ngushtë nuk kishte interes në gjëra të tilla.

Vullneti i Perëndisë më shumë kuptohet, kapet, sesa mësohet; prandaj është e nevojshme të rri me njerëz që kanë të njëjtën dëshirë në lidhje me vullnetin e Perëndisë.

Kjo e shton edhe një herë nevojën e famijes së kishës. Në momentin që njeh Jezus Krishtin ti hyn në familjen e kishës. Kur të hysh në këtë familje, rri dhe krijo kohë për të ndenjtur me këto njerëz, vëllezër dhe motra në Krishtin.

Fjalët e Urta 27:17 *"Hekuri mpreh hekurin, kështu njeriu mpreh fytyrën e shokut të tij."*

1 Korintasve 15:33 *"Mos u gënjeni, shoqëritë e këqija prishin zakonet e mira."*

Një fjalë e urtë thotë: *"Nëse do që të fluturosh me shqiponjat mos u shoqëro me breshkat."*

Nëse do që të përdoresh nga Perëndia në mënyrë më të fuqishme, ndoshta gjëja më e mirë është të ndryshosh shoqërinë që ke tani. Gjej shokë e shoqe të krishtera dhe kalo më shumë kohë me ta sepse në këtë mënyrë ndërtohet, rritet ëndërra e Perëndisë në jetën tënde.

5. E Tregoj Ëndërrën Time Publikisht

"Po përse t'ua them të tjerëve ëndërrën time? Kam turp po e mbaj përbrenda!" Sepse tregon Besim. Edhe të tjerët do të fillojnë të bëhen pjesë e saj dhe të ndihmojnë në këtë gjë. Disa nga ju mund të keni patur një ëndërr por nuk keni patur njeri t'ju ndihmojë për të ecur më tej. E keqja ka qenë se ti nuk ke patur guximin t'i tregosh njeriu.

Në momentin kur i tregon dikujt, po bën një deklaratë besimi dhe të tjerët do të bashkohen dhe do të ndihmojnë ty. Së pari, është ëndrra, ti e shikon atë që do të bëjë Perëndia nëpërmjet teje dhe pastaj ti e kthen në fjalë duke thënë: *"Kjo është ajo se çfarë unë besoj që Perëndia do të bëjë në jetën time."*

Kur vendos një synim, kjo është një deklaratë besimi.

Në Nëntor 2006 unë kam lexuar për herë të parë Ëndrrën e Kishës sonë. Ishim tek qendra e Krishterë, ka qenë darkë, e enjte, u mblodhëm së bashku një natë dhe ishte direkt pas Seminarit 1. Kanë kaluar gati 4 muaj, nuk ka ndodhur ndonjë ndryshim i madh nga ajo kohë, por ama gjërat po lëvizin, tani nuk kemi vetëm anëtarë në këtë kishë por kemi dhe një grup të përkushtuar. Kjo është ëndërr e madhe, është vizioni i madh i kishës, është aq e madhe saqë duhet shumë besim, sepse çdo pikë e saj mund të plotësohet vetëm nga Perëndia, dhe Ai do na përdorë nëse do besojmë tek Ai. **Mateu 9:29** (Jezusi tha) *"U bëftë sipas besimit tuaj."*

Marku 9:23 *"Çdo gjë është e mundshme për atë që beson."*

Vizioni i kishës sonë (Ëndrra e madhe).

- **E kam ëndërr** që kisha jonë të jetë një vend ku mund të gjejë dashuri çdo njeri: qoftë ai që është i lënduari nga jeta, të stresuarit, të shqetësuarit, të hutuarit, dhe të lodhurit.

Në këtë vend çdo njeri të gjejë dashuri, duke filluar nga porta e oborrit, tek hyrja e kishës, brenda dhe kur të ikin, në çdo lloj forme dhe mënyre, pranim të gjithkujt që hyn, ndihmë të gjitha formave, Shpresë, Falje, Drejtim dhe Inkurajim.

- **E kam ëndërr** të ndajmë Lajmin e Mirë të Jezus Krishtit me të gjithë njerëzit e qytetit tonë, në çdo mini bashki dhe në periferi. (Ungjillizimi).

- **E kam ëndërr** të mirëpresim 2% të popullsisë së Tiranës në miqësinë e kishës (ishin vetëm 10 veta që po e dëgjonin këtë për herë të parë), duke i dashur, mësuar, duke u gëzuar me ta dhe duke jetuar në harmoni së bashku. (Miqësia)

- **E kam ëndërr** për t'i rritur njerëzit në pjekuri shpirtërore me anë të studimeve të Biblës, grupeve të vogla, seminareve. (Dishepullimi)

- **E kam ëndërr** për të pajisur çdo anëtar për një shërbesë të caktuar duke i ndihmuar ata të zbulojnë dhuntitë dhe talentet që u ka dhënë Perëndia. (Shërbesa).

- **E kam ëndërr** të dërgojmë qindra misionarë dhe punëtorë kishë nëpër vendin tonë dhe në botën, ta fuqizojmë çdo anëtar për një jetë personale misionare në botë, dhe ti dërgojmë ata në projekte misionare.

- **E kam ëndërr** të fillojmë një kishë të re çdo dy vjet (Në dimër mbushim 2 vjet, po afron koha).

- **E kam ëndërr** të kemi një ndërtesë të bukur në qendër të qytetit, e cila të jetë kisha qendër për qytetin, të jetë e bukur, por së pari e thjeshtë, duke përfshirë një dhomë si qendër adhurimi ku të ulen me mijëra, të ketë një skenë me drita dhe efekte; me grup

ËNDRRA E PERËNDISË PËR JETËN TËNDE - 6 Fazat e Besimit (2)

muzikor të kompletuar, një qendër këshillimi dhe lutje, dhoma për studime Bible dhe për trajnimin e atyre që shërbejnë dhe një vend çlodhjeje për ta.

Të ketë ambiente shumë të lezetshme për fëmijët nga foshnjat deri tek të rinjtë, të ndara më vete.

Të ketë ambiente shumë të përshtatshme për moshën adoleshente dhe më vete për moshën rinore të universiteteve.

Të ketë minimumi dy dhoma adhurimi të veçanta kur muzika e adhurimit në njërin të jetë tip popullore (si tek bbf, unë dëgjoj që shumë njerëz e kanë stacionin e radios ose tv tek këto kanalet popullore, dhe mendoj sa mirë do ishte sikur Perëndia të adhurohej edhe kështu, popullorshë, shqiptarçe) dhe në tjetrën të jetë e qetë, me muzikë të qetë, me piktura të bukura më mur, duke u ofruar njerëzve disa lloje kafesh.

E gjithë kjo të formohet për ti shërbyer njeriut totalisht nga të gjitha anët ajo: Shpirtërore, Emocionale, Fizike dhe Sociale dhe ky vend të jetë i rrethuar me një oborr që ka një kopësht të bukur, të ketë shumë jeshillëk jashtë dhe brenda.

Unë e them sot ashtu siç e thashë para disa muajsh këtë ëndërr me shumë besim që kjo do të bëhet realitet, nuk do të ndodhë brenda një ditë por shpejt me Perëndinë kjo ëndërr do të realizohet.

Pasi e thashë publikisht këtë ëndërr të madhe ndihem më mirë, por kur e lexoj vetëm më frikëson për vdekje, sepse asnjë nga këto pikë të kësaj ëndrre nuk është e mundur me aftësitë, dhuntitë, apo personalitetin tim. Duhet një besim i madh tek Perëndia, shumë i madh.

A do t'i bashkohesh ti kësaj ëndrre të madhe? Ta bësh ëndrrën tënde?

Çfarë bëra unë me ëndrrën e madhe? E mbajta të fshehur? Në fakt, frika e dështimit ka për të mbajtur larg plotësimin të asaj që do Perëndia të bëjë nëpërmjet teje.

Kur e ndan një ëndërr në publik, kjo gjë sjell **tre efekte**:

1. Të nxit ta fillosh atë ëndërr. Nuk ka më vend për hezitime, hamendësime. Tani që e lajmërove, ti je përgjegjës që do ta fillosh dhe to të lëvizësh në atë drejtim që the.
2. Tërheq përkrahjen e të tjerëve. Unë e di që disa prej jush e kanë bërë ëndrrën e madhe të kishës së Tiranës ëndrrën e tyre. Dëshira ime është që të gjithë ta kemi këtë ëndërr, ëndrrën personale. Kjo tregon që jemi një familje, sepse shkojnë të gjithë në të njëjtin drejtim. Mbaje mend, kur një ëndërr është nga Perëndia ka për të tërhequr njerëz dhe shumë prej tyre, ti as nuk i njeh fare, ato do të vijnë dhe do të ndihmojnë. Dhe kjo është ajo që unë besoj do të ndodhë edhe me ëndrrën e madhe të kishës tonë, Perëndia do të ngrejë lidera nga ky grup këtu dhe gjithashtu do të sjellë, do të tërheqë përkrahjen e të tjerëve që nuk

janë në këtë kishë, që unë dhe ti nuk i njohim apo nuk e dimë se kush do vijë, as na e merr mendja që do të bashkohen me kishën tonë.

3. E çliron fuqinë e Perëndisë. Për shkak të besimit, ti ke dalë nga varka dhe ke filluar të ecësh në ujë dhe Perëndia është duke të mbajtur përdore që të arrish atje ku do Ai.

Hebrenjve 11:1 *"Besimi është siguria e gjërave që shpresohen, tregim i gjërave që nuk shihen."*

Hapi 1, faza e parë e besimit është ëndrra. Fillo me një ëndërr, asgjë nuk ndodh në jetën tënde derisa ti të fillosh të ëndërrosh. Unë nuk po them, që mendo çfarë të vijë në mendje.

Unë po të nxis seriozisht, kërkoja Perëndisë.

Unë ju nxis ju, guxoni dhe kërkon i ëndërra të mëdha nga Perëndia.

Të ëndërrosh nuk kushton, ëndrrat janë falas.

Veprat 13:36 *"Davidi mbasi zbatoi këshillën (qëllimin) e Perëndisë në brezin e tij, vdiq..."*

Kjo është ajo që unë dua të thonë të tjerët për ty. Që ti e zbatove, i shërbeve qëllimit të Perëndisë në brezin tënd - pastaj vdiq; të gjithë do të vdesim, por në atë moment mund të thotë dikush *"Ai person vdiq por e plotësoi qëllim që pati Perëndia për të."*

Kjo është ajo që unë dua të thonë njerëzit për mua: *"Altini i shërbeu, e zbatoi qëllimin e Perëndisë në brezin e Tij—pastaj vdiq."*

Veprat 20:24 *"Unë nuk dua t'ia di fare për jetën time që nuk e çmoj aq, sa të kryej me gëzim vrapimin tim dhe shërbesën që mora nga Zoti Jezus..."*

Kjo jetë do kalojë shpejt, dhe do të harrohen shumë gjëra që kanë ndodhur kur ishte ti dhe unë në këtë tokë; por gjërat që ti dhe unë bëjmë për emrin e Jezus Krishtit nuk do të kalojnë shpejt, do të lënë gjurmë të përjetshme.

Cila është ëndrra jote? Cila është ëndrra e Perëndisë për jetën tënde, jo dëshira jote egoiste, por Ëndrra që të ka dhënë Ai.

Ti duhet të jesh i gatshëm të thuash: *"unë nuk do të konformohem me standartin e kësaj bote, por do të kërkoj lavdinë e Perëndisë."* Dhe shko pas kësaj gjëje, nuk ka për të ndodhur brenda një nate. Ne kemi 15 muaj dhe deri tani kemi rreth 15-20 veta që vijnë në kishë. A e di sesa është kjo? Është 0.00002% e asaj që duam të arrijmë, na duhet të kalojmë pesë 0 për të arritur Ëndërrën e madhe. A është ndonjëri këtu, që beson plotësimin e kësaj ëndërre, pavarësisht se sot jemi një grusht të rinjsh, dhe jemi pesë 0 larg? Ne e dimë që nuk do të ndodhë nesër, por besojmë që do të ndodhë.

E njëjta gjë me ëndërrën tënde, ti e di që nuk do të ndodhë sot, por ti po e synon atë gjë. Jeta ka stinët e saj, por ti mos e harxho kot asnjë stinë të saj, sepse nesër është një ditë më vonë në realizimit të asaj që do Perëndia nga ty.

ËNDRRA E PERËNDISË PËR JETËN TËNDE - 6 Fazat e Besimit (2)